

汾州府志目錄

例言

圖

表

以上  
首卷

沿革

卷之一

星野

疆域

以上卷  
之二

山川

卷之三  
卷之四

城池

官署

倉廩

學校

壇壝

以上卷之五

關隘

營汛

驛舖

以上卷之六

戶口

田賦

鹽稅

以上卷之七

職官

卷之八卷之九

宦績

卷之十卷

食封

流寓

以上卷

人物

卷之十三至

義行

卷之

科目

卷之十八

仕實

卷之

列女

卷之二十一

古蹟

塚墓

以上卷之

祠廟

卷之四

事考

卷之五

雜識

卷之六

藝文

卷之二十七至三十四

汾州府志卷之二十三

古蹟

茲氏故城在府治南十五里語轉字訛俗呼之爲甄子  
城史記夏侯嬰列傳從擊項籍卒定楚益食茲氏漢書  
地理志茲氏縣隸太原郡莽曰茲同後漢中平中單于  
羌渠使其子於扶羅將兵助漢討平黃巾會羌渠爲國  
人所殺於扶羅遂以衆留漢於扶羅之子豹卽劉淵之  
父也魏武分其衆爲五部以豹爲左部帥居太原茲氏  
水經原公水出茲氏縣西羊頭山東過其縣北酈道元  
注云縣故秦置也今其地名鞏村有故城遺址北魏所

置西河郡治此其後汾州移治西河不知仍居此城抑  
卽今之府治史無明文可考唐李吉甫元和郡縣圖志  
汾州西河縣郭下八門城在縣北十五里以地望考之  
唐之汾州城卽今府治矣

潞城在府治東十里水經注云文水南逕茲氏縣故城  
東爲文湖世謂之西湖在縣直東十里湖之西側臨湖  
又有一城謂之潞城水澤所聚謂之都亦曰潞蓋卽水  
以名城也

八門城在府治北十五里俗呼羅城元和郡國圖志云  
劉元海遣將喬嵩攻西河築營白固營有八門故名

偏城在府治西南五十里汾陽孝義接境處東南距孝義縣治三十里二縣志皆列之顧祖禹讀史方輿紀要云後趙時築此以防西北諸部其城北占山阜南臨絕澗有敵側之狀因名

陽城在府治南十里魏書地形志西河郡隰城縣下云有陽城是也

舊志古蹟又有祝融城在汾陽縣治之西相傳祝融所築今廢志於城池內有云大城俗名四陽言日四面照也又名祝融者亦此義其說近是蓋祝融四陽皆卽今府城之俗稱非別有一城

方輿紀要隰城故城在府西七十里美稷城在府西  
北漢美稷縣屬西河郡本在今廢勝州西後漢中平  
中以寇亂南徙五百餘里卽此城也尋廢牧師城在  
府西北境漢邊郡皆置牧苑以養馬此卽西河郡牧  
苑也或曰亦在今廢勝州境隰城故城辯詳後及沿  
至漢西河郡美稷其故城在隋時之勝州城西南自  
勝州城北至黃河五里東至黃河五十里唐杜佑通  
典言勝州東渡河至馬邑郡四百二十里者是也漢  
西河郡都尉治美稷建武中詔南匈奴徙居美稷之  
虎澤永初三年南單于叛圍中郎將耿种於美稷四



年梁慳等擊之於屬國城南單于敗還虎澤西河郡  
治及美稷虎澤牧師城皆本在河西永和五年西河  
郡南徙五百九里治離石紀要乃以爲中平中美  
城南徙五百餘里似有舛誤今府西北亦無所謂  
稷牧師城者

汾陽縣志古蹟列定陽城齊斛律光圍定陽築南汾  
城以逼之周使郭榮城於姚襄城南定陽城西今不  
可考案杜佑通典姚襄城西臨黃河控帶龍門寔爲  
險峻定陽卽今吉州治南汾城正值龍門上口壘石  
爲之東北高據峻巍西南俯臨黃河懸崖絕壁百有

餘丈俗呼倚梯城時周齊交爭在彼不在此徵引其事非也北魏太和十二年改吐京鎮爲汾州本治蒲子城孝昌中陷移治西河其所屬吐京五城定陽三郡並寄治焉不必別有三城

臺在府治南一里土人以清明前一日寒食祭食於此

亭在汾州儒學泮池西時金翰林修撰王庭筠書詩石庭筠父遭古爲汾州觀察判官省親至此改爲汾陽縣學舊石漫滅不存今府學及縣學石皆重摹刻者矣亭亦久廢金史稱庭筠讀書

寺因以自號書法學米元章與趙灑趙秉文俱以名家  
舊志又列郭林宗舊宅在東郭相傳天寧寺是其遺  
址文潞公舊宅在縣治之南相傳淨心寺是其遺址  
嘉靖三年改建察院汾陽縣志列汾陽宮遺址在縣  
東十五里段干木廬址在縣治東郭愛子鎮在縣北  
三十里卜子石室在縣治西北四十里謁泉山多出  
於好事者之傳合

以上汾陽縣

京陵城在平遙縣東七里漢縣隸太原郡莽曰致城後  
漢書郡國志云京陵春秋之九京唐置京陵府以居府

兵

文詳沿革

中都城在平遙縣西北十二里漢縣隸太原郡文帝爲代王時嘗遷都於此三國志魏明帝景初二年封孫資爲中都侯水經注侯甲水逕祁縣故城南又西逕京陵縣故城北又西北逕中都縣故城南城臨際水湄又西逕鄆縣故城南今侯甲水逕中都城北水道徙流故也漢西河都有西都縣史記趙世家秦取我西都及中陽秦本紀六國表並訛作中都西陽唐魏王泰括地志云中都故縣在汾州平遙縣西卽西都也蓋因史記訛文遂泐中都西都而一之

文詳沿革

來城在平遙縣西三十五里城塚記云後漢來歙所築  
未聞其審

羌城在平遙縣西四十里舊志云漢建安中築此以居  
羌人來城羌城相距三里汾水舊逕其西今逕二城之  
東

思歸城在平遙縣東二十里晉澗逕其西距青城五里  
方輿紀要劉淵攻劉琨於一築壘以拒守因思歸而  
夜遁故名

蔚州城在平遙縣西北二十五里北魏時爲太原郡鄆  
縣地魏書地形志永安中改懷荒禦夷二鎮置蔚州寄

治并州鄆縣界方輿紀要云蔚州城城塚記謂之屈頓城晉武帝於汾隄側屈曲爲頓後因汾水泛溢廢城後魏於其地僑置蔚州今城址猶存

青城在平遙縣東二十里魯澗逕其西亭岡城在平遙縣南二十八里亭岡水逕其東方輿紀要云青城亭岡城皆後魏所置

故縣隋開皇十六年析平遙置屬介州大業初廢方輿紀要清世城在平遙縣南今無遺址可考

喜雨亭在平遙縣署金大定十二年縣丞寇居慶禱超山有應因建亭署內

金井樓在平遙縣城內高百尺下有井水色如金

舊志古蹟又有尹吉甫將臺在東城上蓋後人所傳  
合辯詳沿革

以上平遙縣

隨城在介休縣東左氏春秋魯隱公五年春曲沃莊伯  
以鄭人邢人伐翼王使尹氏武氏助之翼侯奔隨曲沃  
叛王秋王命虢公伐曲沃而立哀侯于翼六年春翼九  
宗五正頃父之子嘉父逆晉侯于隨納諸鄂晉人謂之  
鄂侯杜預經傳集解云隨晉地考此時隨地蓋姜戎之  
境翼侯既出故王立其子明年乃自隨迎入別居於

鄂隨非國中也。後屬晉爲士會食邑。今無遺蹟可考。

鄆城在介休縣東三十五里。左氏春秋魯昭公二十八年。晉分祁氏之田以司馬彌牟爲鄆大夫。史記平陽侯曹參圍趙將戚將軍於鄆城中。漢書地理志鄆縣隸太原郡。魏書地形志於介休縣云。晉亂罷。太和八年復有鄆城於鄆縣下云。晉後罷。太和十九年復有鄆城一鄆城兩言之者。介休置於太和八年。漢之鄆城在其境內。及十九年更置鄆縣。復以鄆城割入於鄆。非北魏之前有兩鄆城也。其北魏之鄆城在今介休縣東四十五里。前訛作武城。謂秦遣武安君白起伐趙。駐兵於此。因名。



也又詳沿革

左部城水經注汾水西南逕界休縣故城西汾水之右有左部城側臨汾水蓋劉淵爲晉都尉所築也今不可考縣西北十八里有板橋城志云劉淵擊劉琨於此介休故城在介休縣東南二十五里北魏太和八年所置俗目之爲六壁城非也元和郡縣圖志云後魏明帝時爲賊所破至孝靜更修築遷朔州軍人鎮之因立南朔州但領軍人不領郡縣也孝靜因殘破修築宜卽此城今縣治乃漢縣之舊北齊省介休併入永安北周復置介休寔因漢舊治水經注汾水西南逕界休縣故城

西以北魏縣治不在此故目爲故城魏書地形志介休  
晉亂罷太和八年復有介休城以太和中復置之介休  
不於漢介休城故分別言之又興和中置寧州寄治汾  
州介休城宜爲漢之故城也隋書地理志謂後魏置平  
昌縣後周以介休縣入焉開皇十八年改平昌曰介休  
元和志謂高齊省介休入永安縣周武帝復置介休縣  
宣帝改介休爲平昌縣隋開皇末又改平昌爲介休縣  
考北魏所置平昌縣隸五城郡本在今吉州鄉寧縣東  
南孝昌中五城郡陷寄治西河豈因其民僑居於漢之  
介休城故周宣帝時介休改名平昌歟北周之平昌卽

漢介休舊治寔與北魏介休異地是以隋志元和志彼

此互異

又詳沿革

方輿紀要又有平周城在介休縣西四十里考之史記魏世家襄王十三年當秦惠文君改元之三年秦取我曲沃及平周漢書地理志平周縣隸西河郡闕駟十三州志云古平周縣在汾州介休縣西五十里蓋北魏時其地屬介休今介休縣西二十里卽與靈石縣接境其地割屬靈石非復介休境內矣

開元府在介休縣東北八里華夏府在縣東北三十里

皆舊置以居府城

舊志又列郭林宗故宅在北關郭家村今廢華嚴寺  
卽其地假糧堆在縣南四里唐太宗圍尉遲恭於此  
糧餉不繼故負土而以粟覆之金果園在南門外諺  
傳唐太宗收尉遲恭屯兵於此介休縣志又列忌坂  
在縣西南十二里其坂壁立世傳介之推避晉文公  
於此介之推事辨見絲山條下

以上介休縣

六壁城在孝義縣西十二里水經注文水又東南流與  
勝水合水出西狐岐之山東逕六壁城南魏朝舊置六  
壁於其下防離石諸部因爲大鎮太和中罷鎮仍置西

河稱焉。勝水又東合陽泉水。水出西山陽谿。東逕六壁城北。又東南流。注於勝水。魏書地形志永安中置顯州。治汾州六壁城。漢書地理志汾州西河郡有府十二。曰嘉善、六壁、崇德、華夏、靈扶、五柳、京陵、介休、賈胡、寧固、開遠、清勝。皆以居府兵。六壁者辛壁、賈壁、白壁、許壁、柳壁。併六壁城而六。今孝義縣西北二十里有村曰東辛壁。西辛壁。縣西北三十六里。與汾陽縣西南二十五里接境。有村曰賈壁。縣西十五里有村曰白壁關。縣西南十五里有村曰東許壁。縣西南二十五里有村曰西許壁。縣南三十里。與靈石接境。有村曰遼壁。卽柳壁。而六壁

府今呼六壁頭古名皆未變然但爲鄉土所呼地志於六壁府白壁關之外其餘四者不復及之矣

瓜城在孝義縣北十四里與汾陽縣接境左氏春秋魯宣公十五年晉侯賞士伯以瓜衍之縣說左氏者多援孝義之瓜城釋之稽之於古無可證實魏書地形志永安中置定戎郡治瓜城而方輿紀要云虞城在孝義縣城北十里號城在縣北十里俗訛爲瓜城相傳晉滅虞號遷其人於此築城居之因名案瓜號一聲之轉瓜城見魏書而號城不見史志未可謂俗訛號爲瓜也虞城今屬汾陽縣境晉遷虞號之民其事亦無可証實

多城失其所在。魏書地形志：天平中置真君郡，治東多城。武定四年置武康郡，治東多城。方輿紀要云：東多城在孝義縣北二十里，則宜屬汾陽縣境。今二縣皆無可考。

團城在孝義縣西北二十里許。魏書地形志：武定四年置武昌郡，治團城。元和郡縣圖志：孝義團城在縣西北十八里。後魏築以防稽胡，其城紆曲，故名團城。

吐京僑郡在孝義縣西二十里。魏書地形志：真君九年置吐京郡，領新城、吐京二縣。孝昌中陷，寄治西河。

溫泉故縣在孝義縣西九十里。高唐書之西，元和郡縣

圖志武德三年置溫泉縣因縣南溫泉爲名元史地理志至元五年割溫泉縣之半置巡檢司隸本縣

舊志又有吳城在孝義縣西南七十八里史記魏吳起爲西河太守時築以拒秦案史記吳起爲西河守守謂守將非郡守也西河舉龍門西河爲言其時魏與秦以洛水爲界河西濱洛並魏地秦魏相攻在河西不在河東辯詳沿革漢景帝中二年始更郡守爲太守前此亦無太守之稱方輿紀要有魚城在孝義縣北十里或云後魏末六鎮擾亂置城於此爲戍守處孝義縣志有務城在縣西八十里誤兒城在縣西



七十里。

比干臺在孝義縣東二十里。考元和郡縣圖志西河縣北百一十里有比干山。或汾陽孝義之間。比干食邑在焉。未可知也。縣志云舊傳比干避暑處。

溫公鎮在孝義縣東北十里。司馬村舊傳溫公嘗經宿於此。故名。

義虎亭在孝義縣城西。相傳明時有樵夫墮深巖虎穴中。虎負之出。樵夫與虎約。割豚西門外以謝。至期虎來攫豚以去。

魏文侯宅在治東。世傳今察院是其遺址。院之堂

東有八角琉璃井。揜閉不敢啟。方輿紀要列安生原在孝義縣南十里。舊志云土地沃饒有西河之美者。安生原耳。孝義縣志列介休坂在縣西四里。魏文侯臺在縣城內。鄙語云文侯觀魚臺。臺前有魚池。上有看河樓。仙童原在縣西南五十里。禮仙莊。鄙語云漢武帝遇仙童處。栢桑原在王莊里。庾信枯樹賦西河有枯桑之社。

以上孝義縣

太和故城在臨縣南三十里。湫水之左。隋書地理志後周置曰烏突。及置烏突郡。開元初郡廢。縣尋改焉。有湫

水。

臨泉故城在臨縣北四十里。湫水之右。唐武德三年所置。

以上臨縣

土軍故城在石樓縣西北五十里。史記高祖功臣表。十一年封宣義爲土軍侯。武帝元朔二年國除。建元以來王子侯者年表。元朔三年封代共王子郢客爲土軍侯。四年置西河郡。土軍隸焉。水經河水篇。南過土軍縣西。鄜道元注云。吐京郡治故城。卽土軍縣之故城也。胡漢譯言音訛。僞變矣。其城圍長而不方。太平寰宇記云。城

在團團山下其城圍而不方俗謂之團城

長壽故城在石樓縣東五里臨河故城在縣東六十里  
並唐武德二年所置貞觀元年廢五代周廣順初北漢  
劉承鈞自攻晉州不克移軍隰州隰州將孫繼業迎擊  
之於長壽城太平寰宇記石樓縣北六里有夷吾館後  
魏孝文置長壽縣於此案魏隋唐史志皆不言長壽縣  
爲後魏孝文置寰宇記之言未聞所出

石樓縣志又列試劍石在縣西十里相傳宋呼延瓚  
獵此獲劍試石兩分

以上石樓縣

皋狼故城今不可考周成王時趙之先曰孟增居之史記秦本紀及趙世家皆言孟增幸於周成王是爲宅皋狼皋狼生衡父衡父生造父宅皋狼者蓋因所居以爲號徐廣音義云皋狼地名在西河是也後爲趙邑知伯請之而襄子弗與史記建元以來侯者年表元朔三年封代共王子遷爲皋狼侯漢書王子侯表狼訛作琅元朔四年置西河郡皋狼禁焉方輿紀要皋狼城在永寧州西北

藺故城今不可考趙魏之初魏有河西地藺爲趙之邊邑與魏鄰故魏武侯十五年當藺成侯三年魏敗趙

其後魏之河西上郡入於秦趙蘭離石乃與秦鄰漢武帝元朔三年封代共王子熹爲蘭侯漢書熹作罷軍四年置西河郡蘭隸焉方輿紀要蘭城在永寧州西

隰成故城在永寧州西漢縣隸西河郡水經注離石水南流逕離石縣故城西又南出西轉逕隰成縣故城南漢武帝元朔三年封代共王子劉忠爲侯國王莽之慈亭亭也胡俗語譌尚有干城之稱其水西流注於河據道元所記漢隰成縣在離石之西甚明方輿紀要隰城故城在汾州府西七十里漢縣考晉書地理志始改城爲城西河郡領離石隰城中陽介休四縣紀要所目爲

城者殆晉徙治之縣歟。以爲漢縣失之矣。今州西六十八里穆村有一舊城遺址。於水經注之隰成縣地望適合。

左國城今不可考。晉書劉元海載記云。今離石左國城卽單于所徙庭也。元海至左國城。劉宣等上大單于之號。二旬之間衆已五萬。都於離石。尋遷左國城爲壇於南郊。卽漢王位時。晉永興元年也。永嘉初遷於蒲子。方輿紀要左國城在永寧州東北二十里。

盧城在永寧州東二十里。元和郡縣圖志離石縣盧城在東二十里。晉并州刺史劉琨所築。以攻劉曜。案隋

書地理志後周置盧山縣大業初併入脩化有伏盧山  
新舊唐書皆無脩化縣亦不詳其何時省併方輿紀要  
言脩化城在臨縣南盧山廢縣在臨縣東南今永寧州  
東有伏盧山山南盧橋村距州治二十里爲盧城遺址  
元志與元和志相符周所置盧山縣或卽因於劉琨之  
城盧城咸取伏盧山以名城名縣也脩化雖不可考當  
據隋志伏盧山在其境內不得遠至臨縣舊志云盧城  
在州北六十里今亦無有能言其處者臨縣永寧州之  
間徃徃有古城遺址而莫能舉其名古縣名如藺臯狼  
之屬多在此間又不復可考世遠事湮莫足證實大致



然矣。

良泉故城在永寧北六十里北齊所置良泉縣今其地猶呼泉城有遺址。

方山故城一在永寧州北百一十里今呼故縣村唐貞觀十一年方山縣所徙治一在州北百五十里今方山堡金貞祐四年所徙治金史地理志所云徙於積翠山者是也俗因縣名遂呼其山曰方山而隋大業三年徙良泉縣於方山故改名方山石山與故城皆不可考矣方輿紀要云方山城在州西北七十里宜卽隋之方山縣今亦莫知其處。

孟門故城在永寧州西百二十里北周大象元年於此

置定胡縣唐貞觀二年改曰孟門七年廢八年復置曰

定胡金明昌六年又改曰孟門元廢西有孟門關

又詳沿革

方輿紀要又列穀羅城在永寧州北漢縣案漢書地

理志西河郡穀羅武澤在西北武澤本名虎澤唐人

避廟諱所改胡三省注資治通鑑云虎澤應在五原

曼柏之北後漢建武二十六年詔南匈奴徙居西河

美稷之虎澤亦卽此澤也蓋境相接矣其說得之五

原曼柏其故城皆在河西未聞穀羅縣僑置離石紀

要又列虎澤在州北尤失之

以上永寧州

寧鄉故城方輿紀要云在寧鄉縣東案北周析離石置寧鄉縣隋大業初廢其周大象中所置平夷縣金明昌六年改曰寧鄉是爲今縣縣東故城不可考

避兵臺在寧鄉縣南五十里高千丈周盈三里下有清泉昔人避兵居此一名沒虎臺

舊志列龐涓寨在縣北十里龐家會城基尚存周里餘世傳龐涓駐兵於此寧鄉縣志列吳王城在縣西百五十里三交原俗傳爲吳起寨案此二地蓋因古城遺址世遠莫考方俗遂傳合名之無足證實也

以上寧鄉縣

塚墓

晉西河王司馬斌墓在汾陽縣西七里斌字子盛爲魏中郎晉初封陳王咸寧元年改封西河王四年薨唐賈耽刺汾州於古寺中掘得司馬子盛碑太康中尙書郎索靖八分書可辨者大半今其碑不知所在矣

趙離石侯石嵩墓在汾陽縣萬戶山之西趙封嵩爲離石侯卒葬於此

唐郭君墓在汾陽縣北三十五里永安鎮有乾封二年所立碑朱錫鬯撰書亭集唐郭君碑跋云今在汾陽縣

北七十里。余於丙午秋經郭社村。行溝中。仰見土岡之上。碑額微露。環岡數里。乃登讀其文。皆駢儷語。首二行。剥裂。君之名字。門世與撰文者皆闕焉。其知爲郭君者。藉有額存也。碑立於乾封二年。中有云。揮霜鉞而斬老生。蓋從太宗攻霍邑者。按舊唐書。宋老生棄馬投壑。甲士斬之。新唐書則稱爲劉宏基所殺。溫大雅創業起居注。又云。老生攀繩上城。軍頭盧君諤所部人跳躍及而斬之。世咸不知揮刃者之爲郭君。而君之名以石裂終不傳。可惜也。顧炎武金石文字記云。郭君碑。今在汾陽縣北七十里郭社村。案卽永安鎮岡上。距縣治三十餘

里耳作七十里蓋有舛誤又碑文可識者有父嵩三字顧君朱君皆未之及

唐上柱國任君墓在汾陽縣南十里文侯村有上元三年十一月所立碑金石文字記云任君名恭官至金紫光祿大夫上柱國臨濟縣開國男貞觀十七年二月卒夫人郭氏其文有曰齊挂東都之冠先覆北墉之首按論語伯牛有疾注禮病者居北墉下仁山金氏曰墉字誤當作墉蓋室中北墉而南牖墉墻也

唐上騎都尉相里瑞墓在汾陽縣北二十里小相里之北有碑金石文字記云此碑漫滅特甚其可識者曰上

相里府君之碑曰相里瑞字鳳威曰夫人任氏  
而中有而壑②字知其爲武后時立

五代晉建雄節度使相里公墓在小相里之北今猶呼  
大師墓有天福五年十月所立碑李象撰文成知訓書  
金石文字記云五代史相里金傳略同惟傳云字奉金  
而此云字國寶傳云贈太師而此云贈太子太師又封  
西河郡開國侯而史遺之皆當以此碑爲正也

宋狄武襄公青墓在汾陽縣北十里郝洪里劉村有嘉  
祐四年二月甲申所立碑翰林學士王珪奉詔撰文墓  
餘地九十六畷九分有奇

元呂簡肅沈墓在汾陽縣西南二里洪哲里翰林學士  
虞集撰碑文

元國子監司業張益墓在汾陽縣西北三里中千里馮  
家莊

明慶成恭僖王美埽墓在汾陽縣西北二十里宋家莊  
溫穆王鍾鑑墓端順王奇湏墓恭裕王表樂墓悼懷王  
新堤墓並在孝臣里安穆王知燦墓在宋家里

明永和昭定王濟煨墓在汾陽縣北太平里永和王美  
鳩墓在洪西里順僖王鍾鈇墓在小相里榮懷王奇清  
墓在池定里靖惠王表煇墓在羅城里安簡王知燠墓



漢王新壇墓並在取少里恭懿王慎雷墓在三泉里  
明詹事辛彥博墓在汾陽縣西南三里南社村

明長清縣知縣田籽墓在汾陽縣南一里斜敘口之原  
明登州府知府嚴秦墓在府城西關萬歷十三年知州  
白夏爲立神道碑

明孝子劉仲原墓在汾陽縣南董師河南西嶽廟北

明河南左布政使孔天胤墓在府城北人美廂官道西  
明戶部右侍郎王緝墓在汾陽縣西十里萬戶山下

明太僕寺卿張更化墓在汾陽縣西十五里尉陵里

明太常寺少卿張第元墓在汾陽縣西南四十里馬家

莊

明禮部郎中靳光先墓在汾陽縣南三十里靳家莊

明兵科給事中曹良直墓在汾陽縣東北三十五里仁

顏村

國朝車駕司郎中鄭之璞墓在府城西北原底

行人劉興漢墓在城東北文會里

會同縣知縣宋謙墓在府城南關之西

以上汾陽縣

周卿士尹吉甫墓俗傳在平遙縣東門外北路明萬歷

二十五年知縣周知度始於墓前立石題曰周卿士尹

吉甫神道三十四年知縣陳所學以甃砌墓前建享堂

十四十五年知縣楊廷謨封墓修祠蓋不知誰氏之

因世俗所傳合指而實之耳

辨見沿革

齊王妃墓在平遙縣西北二十里

裴部尚書裴誨墓在平遙縣金莊村

唐上柱國梁思墓在平遙縣下西門外誌銘石方二尺  
墓墜石出貞元九年癸酉歲刻不書作者姓字

宋裴尚書墓在平遙縣下西門外

宋禮部侍郎裴定墓在平遙縣下西門外

元評事杜遇墓在平遙縣范洛村

元評事梁秉鈞墓在平遙縣梁官村墓碑中書省選充

汾州教授張藻撰文平遙教授邢仲元書丹鄉貢進士  
趙黻篆額歲次壬寅九月庚辰朔初六日乙酉太原路  
平遙長官男梁琮孫男梁棟次孫男梁翼梁羽立石

元平遙縣尹梁瑜墓在梁官村

元征行都元帥五路萬戶梁瑛墓在平遙縣梁官村神  
道碑文嘉議大夫御史丞行御史臺事魏初撰集賢侍  
讀學士奉議大夫李佃書丹中奉大夫中書省參知政  
事杜思敬篆額延祐元年重九月日少中大夫西蜀四  
川道肅政訪司男天翔立石

元平遙縣尹梁琮墓在梁官村

河東南北路與魯萬戶侯杜珽墓在平遙縣范洛村  
大明威將軍吉州路達魯花赤杜思明墓在平遙縣范  
洛村墓碑母弟前資善大夫中書左丞杜思敬按文延  
禧六年歲次己未十月壬子朔十六日丁卯承直郎登  
州路義烏縣尹兼勸農事臣杜恕立石

元杜文定思敬墓在平遙縣范洛村

元通奉大夫河東山西使杜肯構墓在平遙縣  
范洛村

元集賢大學士晉國公杜瑩墓在平遙縣范洛村

元中少大夫西蜀四川道肅政廉訪使梁天翔墓在平

遙縣梁官村神道碑銘奉政大夫監察御史毫郡李元道撰集賢學士資德大夫吳璠趙孟頫書丹翰林侍讀學士中奉大夫知制誥兼修國史清河元明善篆額延祐二年七月初十日前僉廣東廉訪司事授朝列大夫信州路總管府治中長男梁時中承事郎大名路清河縣尹次男梁時正承事郎秦州成紀縣尹次男梁時義中顯校尉僉濶東海右道肅政廉訪司事次男梁時仁等建

元工部侍郎梁日新墓在平遙縣姚村

元朝列大夫信州路總管府治梁時中墓承事郎大名

臨清河縣尹梁時正墓忠顯校尉僉浙東海右道肅政  
廉訪司事梁時仁墓並在梁官村

孝女墳在平遙縣東七里梁村北相傳趙氏三孝女負  
土爲父墳各植柏一株今猶存一株孝女不知何代人  
故附記於元明間

明高郵州知州任良才墓吏科給事中任良弼墓俱在  
平遙縣北門外

明延長縣知縣雷潔墓在平遙縣南門外

明溫州府同知李頤墓在平遙縣梁趙村

明舉人梁殿邦墓在平遙縣梁官村

明陝州知州王尙龍墓在平遙縣金莊村。

明繩池縣知縣范道行墓在平遙縣南門外。

明永年縣主簿劉士鰲墓在平遙縣北門外。

明華陽縣縣丞梁棟隆墓在平遙縣南門外。

國朝孝子梁州尹墓在平遙縣東郭村。梁州儒墓在西

郭村。

河州知州梁禹甸墓在平遙縣南門外。

順慶府知府梁潢墓在平遙縣南門外。

以上平遙縣

漢李陵墓介休縣志云在縣東四十里陵卒塞外單于

道遞陵屍於長安至介休東四十里下梁李侯村南馬



行遂葬焉。宋天禧二年，鄉民因墓建祠。

縣有道墓。元和志介休縣郭林宗墳在縣東三里。周武帝時除天下碑，惟林宗碑詔獨留。介休縣志云在縣東五里官路南塚，高二丈許，周圍繚以垣牆。案宋嘉祐中謝景初撰魏文侯墓碑云：嘉祐戊戌歲，余爲吏汾州。旣至，考圖牒則云東漢郭泰林宗之墓在介休縣東二里。蔡邕作林宗碑在墓之側，僅用涉郡守園池。見唐開元二十年孝義令楊仲昌所撰魏文侯碑在焉。而於州城東大中佛寺北廡得林宗碑，備刻二辭，其一蔡邕之文，其一記林宗後裔纖悉，不刻立碑之年，載推本似隋唐。

間不知何時移置州城也。子遂墓二碑，昇孝義李令介休閭邱令訪求二墓已而得魏文侯之藏而林宗亡之矣。據此則林宗墓宋時已不可考。豈後人乃復求得之歟。明嘉靖十年知縣王正宗闢地植樹。隆慶三年知縣劉芳環塚磚封高一丈縱橫八丈有奇。二十四年知縣史記事復石砌甬道。

徵士宋子浚墓水經注汾水又南與石桐水合又西逕介休縣故城西城東有徵士郭林宗宋子浚二碑。宋沖以有道司徒徵林宗縣人也。山西通志於元魏又列宋子浚墓在介休縣南西靳村而縣舊志云後魏左僕

宋太師宣都王第二子天統十三年拜車騎大將軍儀  
同三司賜邑天統乃北齊年號僅五年舛誤不可通  
晉介休令賈忠義墓在縣南三里

北魏車騎大將軍穆祚墓在介休縣南七里許

唐御史馬周墓在介休縣東四里官路北有碑記

宋文潞公祖母墓在介休縣西一里許明萬歷中教諭  
趙璿築垣墻建享堂立表

宋總理大元帥曹玠墓在介休縣仁安里東祠在里中  
元汾陽伯鈕克讓墓在介休縣西北三里許

國朝吏部文選同郎中梁欽構墓在介休縣南七里許

新屯村之南

以上休縣

周魏文侯墓宋嘉祐中汾州通判謝景初撰碑云考圖牒則曰魏文侯都之墓在孝義縣西五里他日涉郡守園池見唐開元二十年孝義令楊仲昌所作魏文侯碑在焉其旁記墓在勝水之陽與其周環高大甚備至大甲十年刺史崔駢自孝義移於此已而得魏文侯之藏於是使李令改石別刻楊氏之碑與其所記墓之所在周環高大并崔駢所列者盡鑿而立之墓側案孝義縣境始終爲趙地徒因北魏置西河郡於茲氏唐人遂傳合子夏設教西河在是聞故元和志孝義縣魏文侯墓

在縣西五里段干木墓在縣東北二十五里孝義縣志  
段干木墓在縣東六里又有三子墓在縣西北七里  
段干木墓爲卜子夏段干木田子方墓是一縣中而段干木  
墓已有三矣水經注河水自河北城南東逕芮城二城  
之中有段干木塚今芮城縣東南八里有魏文侯墓東  
北十五里有段干木墓唐貞觀中禁樵採求之於彼爲

近

辨見沿革

孝子郭巨墓在孝義縣東北五里青義村案永安縣以  
縣人孝子鄭興改曰孝義元和郡縣圖志作郭興鄭郭  
字形相似無從考證其孰是其曰郭巨者當卽郭興之

訛

唐上國武府君墓在孝義縣南七里吳屯村其碑銘云  
公諱某字嘉仲西河永安人加游擊將軍卽於咸亨三  
年賓於孝城七里

宋宣皇聖母陵在孝義縣西南六十里宣皇原王才里  
考宋史太祖本紀建隆元年九月丙午奉玉册謚祖曰  
簡恭皇帝廟號翼祖祖妣劉氏曰簡穆皇后皇考曰武  
昭皇帝廟號宣祖然則此稱宣皇聖母當爲宣祖之母  
卽簡穆皇后也

宋劉宣王陵在孝義縣西南六十里下馬寬村

宋系知政事趙景肅昌言墓在孝義縣西五里趙家莊  
北

宋文氏先塋在孝義縣南二十里董屯村葬文潞公會  
祖周國公及夫人郭氏霍氏武氏

宋辛氏先塋在孝義縣西北五里居義村葬辛仲甫祖  
父

明晉恭王妾劉氏墓在孝義縣西南三十里偏店村劉  
氏以子永和王封汾州就窆因葬此

明慶成莊惠王濟炫及唐妃墓在孝義縣西二十里吐  
原村濟炫太祖之孫也永樂元年就封汾州

明慶成榮懿王慎鍾墓在孝義縣西北獨但村。

明陝西按察使梁明翰墓在孝義縣西五里張家莊東  
明兵部尙書霍冀墓在孝義縣北二里新莊村王崇古  
撰墓表。

明監察御史霍莘墓在孝義縣西三里。

明刑科給事中任道克墓在孝義縣西北三里。

霸州兵備副使張冕墓在孝義縣西北二里。

明西安巡撫王裕心墓在孝義縣北三里。以上孝義縣

金吉狀元墓在臨縣吉家莊名失考。

元四川道提刑按察使袁克忠墓太原標本司袁克



墓在臨縣穆村峪。

元洛陽王張宏範墓在臨縣松峪村案元史張柔易州人與宏範字仲疇柔第九子也不知墓何以在此。

元尚書紀秀墓在臨縣北萬安坪。

以上臨縣

五代刺史薛鐵山墓在石樓縣東南二十里麻鄉村碑文剝落。

宋康州團練使呼延瓚墓在石樓縣南九十里忠孝村黃河岸。

元韓子忠墓在石樓縣西北四十里。

元衛國公鄭允申墓在石樓縣南原五里鄭氏先生墓。

至正十六年四月立翰林院承旨榮祿大夫管翰林院  
國史趙孟祚撰文

元褚忠肅不華墓在石樓縣西五十里留村

以上石樓縣

北魏孝文帝陵相傳在永寧州東北七十里拓拔嶺

隋離石郡太守楊子崇墓司法李德紹葬之於離石今  
夫其處

唐右臺侍御史宋務光墓在永寧州南五十里碑文剝

唐右領軍使昌化郡王鄔承珙墓在永寧州東七十里

煖泉滙山

唐吳武烈墓在永寧州東北三十里石村有古碑。

宋陳希夷墓相傳在永寧州城北三陽雲鳳山而大華山希夷峽舊以爲希夷葬處。

宋寇宰相墓在永寧州東北八十里康家嶺相傳卽寇萊公準所葬案寇萊公墓在陝西西安府渭南縣此或別一人也。

宋工部侍郎滕茂實墓在永寧州東七里有自撰碑今不存案茂實遷代州聞欽宗將至卽自爲哀詞且自篆宋工部侍郎滕茂實九字取奉使黃旛裹之後卒雲中元好問中州集云士大夫哀其忠爲之起墳於鴈門歲

時致祭而舊志在永寧州姑仍之

宋王女墓在永寧州西南十里土人名王女滙塚高丈餘

宋石嶺關都部署郭進墓在永寧州北百四十里方山城內田欽祚以暴卒聞贈安國軍節度使中使護葬

金吳永墓在永寧州東北三十里中和原其子希尹撰碑

明宣府巡撫車霆墓在永寧州城北三陽雲鳳山之西有諭祭碑

明工部尙書張襄敏珩墓在永寧州城西十五里于家

原西山麓有諭祭碑

兵部右侍郎張玘墓在永寧州城西

明水圖先生墓在永寧州西北四十里大武鎮不知何  
許人有碑贊其文云問君何事吞聲泣抱茲長憾其誰  
識五月被裘九冬齧雪身雖骨肉心猶金鉄意者文信  
任三百年之綱常蘇武持十九載之漢節依稀乎而亦  
未可必

國朝太子太保于清端成龍墓在永寧州北八十五里

橫泉鎮

以上永寧州

元昭毅大將軍陳資壽墓在寧鄉縣城南三里許薦灣

元知石州事高岡墓在寧鄉縣城北半里許二郎坪有碑銘少中大夫幽東東道提刑按察使尙祇適撰正議大夫中書禮部尙書王博文題額至元二十六年乙丑宣授奉訓大夫安西路乾州知州兼管本州諸軍奧魯男高彥萃立石

明山東布政司叅政劉有誠墓在寧鄉縣城北半里許二郎坪有墓表賜進士資德大夫正治上卿加一品俸戶部尙書侍經筵復齋王友賢撰賜進士資德大夫正治上卿都察院掌院事左都御史前兩京吏刑部尙書涇陽漸菴李世達篆額賜進士通奉大夫陝西布政使

司布政使應城宏岡陳藻書。

明戶部尚書贈太子少保王友賢墓在寧鄉縣城北五里許卧牛坪有勅葬祭碑曾勅修。

國朝高烈女墓在寧鄉縣城北里許野狐子溝坪烈女

郭以屏之聘妻也與以屏合葬。

以上寧鄉縣





汾州府志卷之二十四

祠廟

三皇廟在汾陽縣治西南元元貞初命部縣通祀二  
伏羲以勾芒配神農以祝融配黃帝以風后配黃  
俞附以下十人姓名見於醫書者並從祀有司於  
二季行事而以醫師主之今府城東北三里許又有  
轅廟介休孝義永寧則有藥王廟

臺駘廟在府城東南三里唐貞元九年建有碑令狐楚  
撰文五代晉封昌寧公宋稱宣濟廟又有金大定十二  
年汾州觀察判官王遵古碑銘石樓縣在翠金山

源神廟在介休縣東南鸞鴛泉上宋至道中建祀堯舜禹三聖而平遙縣北門外有帝堯廟康熙中知縣王綬建以平遙本作平陶傅合也孝義縣北十里司馬村有大禹廟元大德九年建臨縣大禹村亦有禹廟

三廟在平遙縣朱坑村

比干廟在永寧州北呂梁山上九域志云石州有比干祠禱驗

高真廟在平遙縣東城上元皇慶元年創立又曰節士廟在上東門內二廟皆以祀尹吉甫謂北伐獯豸駐兵於此由後人誤釋詩之太原致滋傅合

辨詳沿革

思惠侯廟在介休縣東北義安村祀晉大夫狐突又永  
寧州東劉王嶼有狐偃廟

夷吾廟在石樓縣東南四里屈產泉上

晉介子廟一在介休縣城西一在縣東小宋曲平遠縣  
城西亦有介子推廟兼祀狐突卜子夏田子方

潤濟侯廟在府城西北白彪山麓宋崇寧間稱天澤廟  
宣和元年封潤濟侯碑銘知汾陽軍事周煒撰土人稱  
爲賀魯將軍府城內及介休縣北河村孝義縣西北郭  
村亦立廟元至元中馮鈺撰河村新修潤濟侯廟記以  
北魏源賀實之案白彪山之馬跑泉卽水經原公水以

趙襄子之臣原過，得名後世猶有原公池之稱。俗傳北魏賀魯將軍，驍師於山馬跑得名。故其泉一名賀魯泉，又名馬跑泉。考之北魏無所謂賀魯將軍者。馮鈺因原公池之目，遂歸於源賀。三晉之原過，在北魏源賀之前八百餘年。馮氏未察原公水爲古名，而原源音同。又取一賀字，傅合鑿矣。唐時突厥室黠密可汗之五世孫名賀魯，屢入寇，顯慶初西域平，蕭嗣業執之以歸。賀魯謂嗣業曰：我亡虜也，先帝厚我，我則背之。今大降怒，罪尚何道？且聞漢法殺人必都市，我願就死。昭陵謝罪於左也。既至，獻昭陵赦，不誅，裂其地爲州。縣賀魯死，詔葬。

頤利塚旁紀其概於石是賀魯寔有其人然在唐而非北魏其足跡亦未至河東白彪山之麓名壺盧谷此泉又有壺溪之稱殆壺盧賀魯一聲之轉遂致滋異說而忘其水之由來不起於北魏且忘原公水之爲古名今此水宜復舊名爲原公水則主是水者宜以原過實之襄子滅知伯祠霍太山三禮於百邑使原過主之又有原過水在今榆次縣水西岸上有原過祠皆地相連屬此地或古曰原公祠故以之名水耳

子夏祠一在府城北十八里大相里元樊宗英建一在城東十里明嘉靖三年分守冀南道王崇慶改元元宮

建二十八年以段干木田子方附焉更名三賢祠一在平遙縣南岳壁村元至正間建而介休縣仙臺村孝義縣治南俱有三賢祠此外所稱子夏祠段干木祠者村中往往有之府境雖非魏地然志仰昔賢師其道德何地不可嗜學之心爰爲立祠固其宜矣

魏文侯廟在孝義縣治南元中統三年建

漢高祖廟一在永寧州北漢高山上高祖破左右賢王追至離石後人立廟一在石樓縣西三十里團圓山之巔

樊王廟在介休縣東南三十里樊王村祀漢舞陽侯樊

嬰廟在平遙縣東嬰溪上。縣志云：漢高帝征陳豨時，嬰屯兵駐此。後以禱雨靈應，封利潤侯。

李陵廟在介休縣東四十里陵墓旁。元大德十一年建。漢武帝廟在永寧州北百六十里。宋五禮新儀祀漢孝武皇帝於永興軍，以大將軍衛青及驃騎將軍霍去病配。

郭有道廟在介休縣城北。

關聖廟在府治西。平遙縣在縣治西南。介休縣在城東二里。孝義縣在縣治南。臨縣在縣治東南。石樓縣在縣

治東北永寧州在州治東寧鄉縣在縣治東皆有司致  
祭及朔望行香者其民間別立廟隨在多有前代各有  
封號國朝順治九年封忠義神武關聖大帝雍正七  
年定制郡縣胥歲三祭五月十三日及春秋二仲月之  
上庚乾隆某年以原謚壯繆侯未允改曰神勇三十三  
年加號靈佑

潤濟侯廟在平遙縣東麓臺山劉嶠遊麓臺山記曰碑  
云王允姪王浚化於此山語多誕祁縣志云浚允子仕  
魏官太尉封南鄉侯誅司馬氏不果死之鄉人竊葬於  
麓臺立廟祀之并祀其母與妹後人禱雨輒應案後漢



二允傳長子侍中蓋次子景定及宗族十餘人皆見  
惟兄子晨凌得脫歸鄉里三國志王凌傳叔父允  
爲漢司徒誅董卓卓將李傕郭汜等爲卓報仇入長安  
殺允盡害其家凌及兄晨時年皆少踰城得脫正始初  
爲征東將軍假節都督揚州諸軍事二年吳大將全琮  
數萬衆寇芍陂凌率諸軍逆討力戰連日賊退走進封  
南鄉侯是時凌外甥令狐愚以才能爲兗州刺史屯平  
阿舅甥並典兵專淮南之重凌就遷爲司空司馬宣王  
旣誅曹爽進凌爲太尉假節鉞凌愚密協計謂齊王不  
在天位楚王彪長而才欲迎立彪嘉祿元年十一月愚

遣張式詣彪未還會愚病死三年春吳塞淦水凌欲因  
此發大嚴諸軍表求討賊裴松之引魏書曰愚字公治  
本名浚黃初中爲和戎護軍烏丸校尉田豫小違節度  
愚以法繩之帝怒械繫愚免官治罪詔曰浚何愚遂以  
名之于寶晉紀曰凌到項見賈逵祠在水側凌呼曰賈  
梁道王凌固忠於魏之社稷者惟爾有神知之三國志  
又言凌死後發凌愚冢剖棺暴屍於所近市三日燒其  
印綬朝服親土埋之于寶晉紀曰兗州武吏東平馬隆  
託爲愚家客以私財更殯葬行服三年種植松柏一州  
之士愧之據此則封南鄉侯官太尉者乃王允之兄子

許非允子也而名浚者乃王浚之外甥令狐浚浚先浚  
死及暴屍後兗州武吏馬隆爲更殯葬豈茲山卽其更  
葬之所歟俗呼是廟曰王浚廟或山有古碑因令狐浚  
避友王浚事而碑文殘闕遂以爲王姓浚名祁縣志不  
復詳考猥稱浚允子官太尉封南鄉侯謬矣

賈侯廟在介休縣南三里晉介休令賈渾墓側縣境及  
孝義永寧寧鄉境民間亦多立廟以爲禱禱雨澤之所  
俗呼龍天廟

劉刺史祠在永寧州西北馬頭山北祀晉并州刺史劉  
琨

祖遜廟在永寧州西北馬頭山北以晉豫州刺史祖士雅嘗駐軍此山土人立廟祀之

北魏孝文廟在永寧州北孝文山上有碑一長丈餘廣五尺文字漫滅

秦王廟一在介休縣東南十里崇賢村一在縣東溫村以唐太宗爲秦王時討劉武周駐兵於此土人立廟  
秦侯祠在介休縣治大門內祀翼國公秦瓊

尉遲敬德廟在孝義縣西十里尉家莊

康太尉廟在介休縣東下莊村祀唐殿前護駕將軍康深

汾陽王祠一在府城北二十里。明萬曆十三年知州白  
以佛寺建。一在城南。萬曆四十三年同知楊伯柯建。  
此地以汾陽名軍起於宋。以汾陽名縣起於明。而汾陽  
郡王之封非於此。然當僕固懷恩頓兵汾州。御史大夫  
王翊使回紇還。懷恩慮洩其交通狀。因留不遣。卽使子  
瑒攻辛雲京。雲京敗。進攻榆次。顏真卿言於帝曰。今言  
懷恩反者。獨辛雲京。李抱玉。駱奉先。魚朝恩四人耳。白  
餘盛言其枉。懷恩將士皆部子儀舊部曲。陛下若以子  
儀代之。喻以逆順。必相率而歸。從之子儀至河中。焦暉  
白。等斬瑒首獻闕下。懷恩與部曲三百北渡河走靈

武則以消亂之功立祠於此宜也。

鄭孝子祠在孝義縣北門內。又縣東五里清義村有郭巨廟。縣西五里下坊村舊有龍天廟。明萬曆中縣人趙訥改祀郭巨。鄭興稱天經地義廟。城南有河神廟亦附祀二孝子。案郭巨非孝義縣人。而鄭興元和郡縣圖志作郭興。俗又指稱郭巨。訛謬相承習焉。不察矣。

趙相公廟在臨縣南七十里郝家塔村。祀五代晉中書令晉昌軍節度使趙瑩。宋元豐四年帥臣孫永固祈禱有應。奏封明靈侯。

懷希夷廟在永寧州北二里三陽山上。

狄武襄公祠在府城西門內。明萬曆五年提督學政鄭  
旻檄知州張一敬選公後裔給衣巾俾世奉祀。

文潞公祠在介休縣城北。舊未列祀典。乾隆三十四年  
因知縣王謀文請奉上憲議於縣令。繁費內歲開支銀  
四兩以供春秋之祭。

忠孝祠在府城南。爲明都御史辛彥博長清令田籽建。  
後增入登州府知府嚴泰。

陳公祠在孝義縣北城上。祀明知縣陳情。

楊公祠在寧鄉縣城南。祀明知縣楊正達。

史侯祠在介休縣城東。先農壇東偏。縣人祀明知縣史

記事

孟公祠在孝義縣城南祀明知縣孟道溥

黃太僕祠在府治東卽冀南道署故址康熙五十年建祀贈太僕卿汾州府知府黃廷柏

謝公祠在永寧州治北城隍廟東祀知州謝汝霖

舊志汾陽縣又有項橐祠在縣西三十里武安王廟一在縣治南一在東郭永寧州又有思鄉廟在州治西世傳有宦遊者自長安來過此回望思親遂立化於此永寧州志列元濟廟在州治北山西通志永寧州列莊麟祠麟禱雨輒驗人號爲雨師莊老臨縣鄉



民也。順治初卒，年七十餘。士人立祠河干，於祠禱雨，猶驗。

畢宿廟在府城西北三里許。金泰和元年重修。許安仁碑記稱：宋景德以前已有之。中州集許內翰安仁字子靖，河間樂壽人。大定七年進士，歷禮部員外郎，出守澤州，同知河南府事。以汾陽軍節度使致仕。子古，字道真，父子俱名流也。元遺山題許汾陽詩後云：許彥清示其從祖汾陽君山水圖詩，字意高妙，而其字畫與明昌辭人龍岩黃華、黃山諸公各自名家，世猶寶惜之。其子右司諫道真亦以能書稱。今廟中許節度碑具存。

文昌廟汾陽縣在縣治西北平遙縣在縣治東北介休縣在儒學東孝義縣在城東南臨縣在文廟東南永寧州在文廟東寧鄉縣在縣治東其餘所在多有天官書中宮斗魁戴匡六星曰文昌宮一曰上將二曰次將三曰貴相四曰司命五曰司中六曰司祿世俗乃求一人以實之事出於無稽

元武廟亦曰元帝廟亦曰真武廟汾陽縣一在東郭新巷一在城門上一在西郭一在東郭東北平遙縣一在縣治東北一在城南介休縣在城北孝義縣一在城北門內一在南關城上臨縣在城內長壽山之巔石樓縣

在縣治北永寧州在州治東寧鄉縣在縣治北其餘所  
在多有考工記龜蛇四旂以象營室也鄭康成云營室  
元武宿與東壁連體而四星又曲禮言軍行前朱鳥而  
後元武左青龍而右白虎春秋說所謂北宮黑帝其精  
元武元取水色武取龜蛇象有甲能捍禦是也

文湖神廟在府城東文湖隄上其來已久有唐碑令狐  
楚撰文宋崇寧間汾水泛漲碑沒金大定中同知汾陽  
軍節度使雷志重修

昭濟聖母廟在府城北七里賈家莊下有泉曰悶泉引  
資灌漑介休縣西十里有助國聖母廟

縣志云唐貞觀十五年勅建

東嶽谷又有聖母廟祀介之稚妹孝義縣臨縣皆有聖母廟在縣治東南永寧州在柏窰山

應潤侯廟在平遙縣東南超山宋宣和元年勅賜廟額有牒文碑又有知汾州事周燁所撰祭文宣和二年三月立石廟有井池禱而取水處也

源神廟在平遙縣東南永泉里元大定三年建

河神廟在平遙縣城東惠濟橋北

崇應侯廟在臨縣北六十里紫金山旱禱有應勅封浮濟王土人呼三石郎或云石勒祠

湫神祠舊在臨縣城東石隄上明萬曆中知縣常時芳

建後圯於水移建東城下又圯於水遂於東城樓上水  
神廟兼設湫河神之位

濟瀆祠在臨縣東五里許甘泉溝導源處明正統七年  
歲大旱知縣郭元屢禱不應元濟源人遂遣僚屬赴濟  
源迎濟瀆神霖雨隨降累歲大熟因立廟於此

府城南元至大二年建西嶽廟而鐘鼓樓北有東嶽  
廟介休縣城東南隅及縣山有五嶽廟孝義縣則元  
至大元年建東嶽廟延祐五年建南嶽廟俱在城東  
南至正十年建中嶽廟在城西南至大元年建西嶽  
廟在城西北建北嶽廟在城北臨縣東南二里許甘

泉溝口有東嶽廟東北八里許高山之巔有北嶽廟  
介休縣張蘭鎮石樓縣東關永寧州治西北寧鄉縣  
鳳山俱有東嶽廟出於流俗所爲非所當祭也

上清宮在汾陽縣北七里宋大中祥符三年建內有  
古柏二株

長春觀在汾陽縣西十里田村之鶴鳴洞遊人拍手  
洞中聲應手若鶴唳因以名焉元初張真一號丹華  
子居此中統中增建殿閣

仙槐觀在府城隍廟東相傳槐已枯朽如剗舟狀金  
皇統中異人投之藥槐復茂因建觀卽以仙槐名有

勝默子步槐下長吟云真仙有似閑庭樹心死心空  
不記年

元真觀在汾陽縣治南元初建有翰林修撰張益碑  
記明萬歷二十四年永和王拓修又名法元宮

崇勝禪寺在汾陽縣北二十里大相村齊天保二年  
建有天保三年正月所立碑八分書碑刻佛像其下  
方及兩旁皆題名碑陰有文併頌一通漫滅顧炎武  
金石文字記載是碑

靈巖寺在汾陽縣東北小相里之西隋唐以來代加  
修葺明嘉靖中構浮圖七級萬歷中慈聖太后頒賜

全藏發帑創建經閣神宗御書恭熹萬安閣額於七佛殿後造無梁洞建閣高七丈有奇上起水陸樓天宮寺在汾陽縣董寺里隋唐以來鉅刹也太平里之法興寺池定里之馬鳴寺皆其下院。

資福寺在府城南郭隋開皇二年建。

天寧寺在府城東郭西北隅相傳爲郭林宗故宅唐建大中寺宋改名太子院善昭禪師住此偶罷夜叅有振錫而至者謂會中有大士六人柰何不爲說法言訖去明洪武十四年大加修建更名天寧寺置僧正司釋了覺詣崑山從慧澄落髮徧遊名席探得元



樞後住此十有七年。壽八十一。枕股而寂。內有萬佛樓。叅政宋岳修。孔天侑撰記。王緝書。

石塔寺在汾陽縣西五里。舊名開元精舍。唐時無業禪師號澄源。本商州上洛人。姓杜。止西河衆香佛刹。州牧董叔經延住於此。學者致問多荅曰莫妄想。憲宗召以疾辭。穆宗遣僧錄靈準賫勅迎。遂示寂。長慶三年十一月葬練若之處。琢石爲塔。謚大達國師。

石佛寺在汾陽縣東北四里米家莊。唐大順二年建。淨心寺在汾陽縣治東路北。相傳宋文潞公舊宅。嘉祐八年建寺。明嘉靖三年分守冀南道王崇慶改建。

察院御賜潞公詩勅碑移置學宮。

顯慶寺在汾陽縣北十里狄武襄塋側宋時以守塚奉祀建元增置祠侍講木寅撰記。

白雲寺在汾陽縣東三十里杜村宋政和七年建。

龍橋寺在汾陽縣西北二十五里白彪山上有龍橋洞洞頂建佛殿僧胥穴居巖棲。

實際寺在汾陽縣西北二十里狄谷里之北山巖際棲閣懸樓水竹穿繞最爲幽勝。

太平崇聖宮在平遙縣下東門內唐顯慶二年建太平觀道人薛守元所居締造爲一方名勝宋治平元

聖勅賜清虛觀額有清虛真人畫像元祐七年修權  
州軍事判官謝悰記太廟齋郎朱處厚書金趙秉  
文卓書陰符經在觀內石多剝藏枯骨碑銘皇統中  
李致堯撰并書元初改太平興國觀後勅改太平崇  
聖宮蒙古碑于道淵授通玄效外靜照大師冀寧路  
平遙縣太平崇聖宮住持住持示提點高道陟通義中  
和大師本宮提點趙道道常妙大師提舉有玉  
皇閣高百尺歲久浸圯成成化間重修觀多古碑有  
禮部學士郝純夫題名得得命思賢安樂會詞石碣清  
和真人畫像郝真人碑郝志松字善甫元制贈能仁

普濟冲虛真人翰林學士朝請大夫知制誥修國史  
姚樞撰八分書多剝又有清和子手書元丁酉提點  
大師潘德冲立石西源散人李晉子蓋氏跋清和子  
邱長春弟子也元掌教大宗師賜號清和道人觀內  
古柏十六株殿前十閣下閣後共六胥怪偉而閣下  
三株尤奇相傳唐時植

上清觀在平遥縣侯冀村宋時建

崇壽觀在平遥縣城內東南隅宋建

柏仙觀在平遥縣西南十里胡村元皇慶二年重建  
中有古柏一本五枝圍二丈五尺西向一枝以石柱

擎之石入柏尺餘拔柱離地一柱金泰和七年一柱明嘉靖三十年一柱磨滅不可辨

瑞雲觀在平遙縣閻良莊舊名虛白菴元賜名瑞雲觀其左有菴曰太上菴

洞元觀在平遙縣達蒲村勅建

棲真菴在平遙縣東北十里舖明崇正十六年建

百福寺在平遙縣東南四十里超山北魏熙平中建舊名郭村寺北齊淨愨禪師住此宋嘉祐八年勅賜百福寺額有牒文碑金時釋益公名志益初剃度於柏山後得法蒙山雲和尚叅頌曰跛躄痿羸鈍復痴

口如鼻孔。眼如眉。自從一吸西江盡。天上人間更不疑。學士王庭筠子端。閒居與雲和尚友。因見益公。益公歸晉。過庭筠。庭筠贈以詩。承安元年。棲此。貞祐二年。坐化。年七十有五。寺內有百福井。禱雨輒應。民亦祈病多獲愈。有元遺山題名石。溫仁甫跋。

鐵佛寺。在平遙縣東南十五里細遙村。北齊武平二年建。

興隆寺。在平遙縣南二十里清村。北齊武平四年建。舊名雙和寺。宋嘉祐八年改今名。

太子寺。在平遙縣治東敬義坊。初名寶昌寺。隋開皇

中建後改名修念寺中有淨梵王太子像氣韻如生  
世傳安生所塑唐武宗大毀佛寺頴上人匿像南河  
孺坎崖元至大中修寺移像寺中改名太子寺明洪  
武中置僧會司併集福小太子寺入焉

金相寺在平遙縣西十里曹村唐貞觀元年建

普恩寺在平遙縣水龐莊村唐貞觀七年建金大定  
三年勅賜今名莊八龐鶴坐化瘞莊南寺中有龐公  
鐵像

慈相寺在平遙縣東十五里冀郭村舊名聖俱寺唐  
無名禪師居麓臺山四十年肅宗召至京叩無名之

旨蒼曰：大方造物，總持萬變，走爲日月，駕爲雲雷。四時行，百物生，收功於無形者，天地之心也。大人御世，不煩而治，鼓之爲太和，不識不知而天下歸心焉者，至人之妙也。是故上聖得之而無爲，彼蒼燾之而奚言，抑何絮絮於細名哉！上善其言，待若惇友。上元初，化。詔還葬故山，宋慶歷間建塔，又名麓鏡臺。有慶歷中碑銘，碑高丈餘，闊四尺餘，字方二寸，其款勒可識者。一曰：朝奉郎守秘書省著作郎知并州太谷。一曰：朝奉郎太常博士通判石州軍兼管，後存慶歷六年五月二十二日十字。金明昌五年重修，改名慈相寺。



安泰撰記門外之西有宋丞相張天覺撰荆南玉泉山寺關將軍廟記碑東則金泰和元年汾州觀察判官趙大端撰僧衆塔記碑巖坦八分書寺東一碑趙大端碧鮮堂詩泰和二年刻石寺有聖水池水醫眼又名眼藥池今湮聖水池記石刻剝落依稀可識金明昌元年麓臺老人數字

集福寺在平遙縣下西門內唐時哲法師住此有泰和末董紹祖樂府辭石碣在寺壁泰和戊辰前四月中旬後二日寓汾庠進士馮天傑謹跋昭信校尉行

汾州府平遙縣劉鎮立石

法燈寺。在平遙縣西南堡和村。唐時釋卧如住此。洞達科條。無病而寂。後多顯跡。宋元間寺燼。像獨存。時人異之。因號爲卧如菩薩。

吉祥寺。在平遙縣治東北。內有唐貞元九年梁思墓誌銘石。

智覺寺。在平遙縣西北張趙村。唐太和三年建。

福智禪院。在平遙縣西北二十里北郡里。唐太和七年建。

石佛寺。在平遙縣西北張村。唐大中元年建。

妙法寺。在平遙縣西南十五里侯冀村。唐建。

善音寺在平遙縣西南二十里常村唐時建

青霄寺在平遙縣東南三十里坡底村唐建

梵業寺在平遙縣南二十里西泉村舊名靜觀寺宋嘉祐八年勅賜梵業寺額有碑

顯慶寺在平遙縣南岳壁村舊名永顯寺宋嘉祐八年勅賜顯慶寺額有碑

聖壽院在平遙縣西北四十里寧固村宋治平四年勅賜額有碑

壽聖寺在縣南西源祠村謝金吾建宋瑞平四年勅

賜今額

洪濟寺在平遙縣達蒲村。宋紹聖四年建。金大定四年勅賜今名。

睡佛寺在平遙縣。釋清源代州人。年六十。棲於此寺。百有五歲。端坐而化。

龍泉觀在介休縣城東街。隋義寧初建。唐太和三年修。

太虛觀在介休縣東二十里石桐村南岡。金大定五年建。

三清觀在介休縣治北。元至德二年建。

保陽觀在介休縣東三里石河社。置道會司。

鉄瓦寺在介休縣南懸山漢建安中建其山峰曰摩  
斯頂摩斯者唐時釋志超之弟子

石桐寺在介休縣東水經注汾水又南與石桐水合  
水出介休縣之懸山北流逕石桐寺西卽介之推祠  
也又西流注於汾水今縣東南二十里有石桐村寺  
久廢

興聖寺在介休縣東四十里上梁村北魏太和二年  
建

興國寺在介休縣西南抱腹巖之麓卽廻鑿寺也唐  
太宗有遊巖至廻鑿寺詩宋建隆三年重建勅名興

國寺

華嚴寺在介休縣城北關相傳卽郭林宗故宅唐時僧志超自五臺還講經於此元中統二年重建

宏濟寺在介休縣西南二十二里師屯村高巖上朱錫鬯曝書亭集云唐太宗破劉武周於汾州立宏濟寺又名滾鐘寺相傳釋志超自華嚴寺移住於此旣而止繇山抱腹巖寺僧汲水於汾甚艱建浮圖時每旦見水甕常滿衆異之密踪跡於山門外有以滾汲水而至因覘者有聲倏不見鐘遂墜地滾入汾水後河津縣覺成寺於汾水得鉅鐘孔皆銅鑄人以爲卽

此鐘今寺東南有滾鐘坡春夏間草茂獨自寺側至山下一道草胥偃望之宛然可辨。

雲峰寺在介休縣西南抱腹巖上相傳唐太宗夢建石梯陡峻古洞天成釋志超自滾鐘寺移住此寺貞觀初坐化太宗詔建寺賜號空王佛塑像寺中有二橋一曰鹿橋一曰鬼橋巖右有鉄索嶺嶺上有五龍巖對峙有說法臺竹林寺在鉄索嶺上距抱腹巖三里又有雲中寺在曰雲洞下土人呼爲中巖光明寺在圪堆頭土人呼爲下巖卽入縣山所取徑。

普濟寺在介休縣東二十五里張良村唐貞觀七年

建。

寶豐寺在介休縣南十里遐壁村唐貞觀十八年建  
興王寺在介休縣城東南隅唐貞觀中勅建明永樂  
間晉恭王重建。

賢福寺在介休縣西七里大宋曲唐先天二年建  
三祥寺在介休縣東十七里兩水村唐開元中建  
慧明寺在介休縣東北十八里東段屯村唐時建。

崇壽寺在介休縣城東南隅宋大中祥符八年勅建  
明洪武八年修置僧會司。

空王院在介休縣文氏先塋宋文彥博奉墳寺也有。



藏經

安化寺在介休縣東五十里張原村宋崇寧二年建  
永利寺在介休縣東三十里鄆城西宋大觀元年建  
顯聖寺在介休縣東三十五里下梁村金大定元年  
都僧錄雄辨建

廣和院在介休縣西二十二里郭壁村金大定六年  
建碑字半剥落

希真觀在孝義縣南不遠吳屯村元建

清虛宮在孝義縣西兌九峪面對柏山

元都觀在孝義縣東今廢

普化寺在孝義縣東五里大村唐貞觀六年建宋景祐二年修明萬曆中縣人霍冀梁明翰張芹張艾並讀書此寺

護國寺在孝義縣東十里盧家莊宋天禧二年修越二十二年爲寶元二年有傅從政碑記

永福寺在孝義縣南二十二里董屯村唐時建賜廣法寺額宋慶歷八年改今名爲文氏墓寺文潞公有永福寺藏經記

法性寺在孝義縣南十五里南姚村宋宣和九年建太子寺在孝義縣中陽樓東金天會三年建

崇聖寺在孝義縣南七里吳屯村金大定十年建

廣仁寺在孝義縣南門外金大定十年建

廣濟寺在孝義縣西稍門外金大定十三年建

香嚴寺在孝義縣南十七里下柵村元大德八年建

慈聖寺在孝義縣南三里曹村元大德十年重建

華嚴寺在孝義縣西北六十里龍隱山隨山巔層遞

爲梵刹康熙三十四年德楷建

明真觀在臨縣北一金大定四年建今廢

西雲觀在臨縣西南十里大同磧口元皇慶中建

浩然觀在臨縣東一里明洪武間置道會司後改建

鳳山嶺上

普照寺在臨縣南八十里招賢村漢建唐乾符北漢天會間屢修碑剝落不可辨識金大定中賜名普照禪院有牒文碑

慈雲寺在臨縣東南五十里漢建金大定三年重建內有石碑二瑩澈如鏡照見山川人物土人呼鏡碑正覺寺在臨縣西九十里漢建一云金太和三年建多古柏

善慶寺在臨縣南三十里府底村隋開皇中建卽古晉訓府東關豐市街釋智祚住此有戒行

觀音寺在臨縣西九十里唐建

廣嚴寺在臨縣西南六十里劉家會村唐建

蕭寺在臨縣南二十里殿梁載宋雍熙年號

天宮寺在臨縣南七十里醫兒泉村宋建

叢福寺在臨縣西五十里宋建

純孝寺在臨縣西南三十里孝彰村宋建

大覺寺在臨縣南九十里一名香爐寺宋建

普化寺在臨縣賢良坊金皇統二年建大定三年造

大鐘重數千斤聲聞百里明崇正壬申寺遭寇燬鍾

際地損

林峰寺在臨縣北四十里廟坪村金皇統三年建今廢。

隆福寺在臨縣西北五十里紫金山東麓金泰和五年建。

東林寺在臨縣東二里許明成化十二年建。

佛堂寺在臨縣南六十里一名義居寺背山臨水古柏參差內有萬佛洞。

老君觀在石樓縣北十里東衛村。

永慶寺在石樓縣治東崇文坊宋太平興國七年勅修元大德十年重建明洪武中置僧會司。

洪福院在石樓縣南關面對翠金山宋慶歷間建明  
嘉靖乙卯冬地震圯復修建內有古鐵佛高數丈白  
牡丹數本

般若院在石樓縣西五十里留村金天會十一年建  
聖壽寺在石樓縣西三十里元延祐間建

竹筴寺在石樓縣西百二十里義牒村西黃河旋繞  
如在中流

龍顏寺在石樓縣西南十里龍臺村明嘉靖四十五  
年修

黃雲寺在石樓縣東六十里黃雲山有黃雲祖師修

真洞今廢

元天宮在石樓縣西北飛龍山縣人賀登科年十八  
卽結廬是山後建宮三座造銅殿一座及銅牌坊一  
康熙四十二年兀坐而化壽七十有八縣人塑像祀  
之

普濟院在石樓縣北六十里永曲村

清涼院在石樓縣西北九十里下馬村

洞陽觀在永寧州東南五十里卽九鳳山白馬仙洞  
也唐貞觀中勅建觀後卽白馬洞世傳有白馬逐之  
入洞至今蹄跡猶存又有夫婦畜黑犬胥化此塑像



廟側晉高祖旱禱輒雨天福改元詔封淵濟仙洞勅  
樞密使桑維翰書額

元都觀在永寧州東北元中統間建明洪武間置道  
正司

卧龍觀在永寧州西五十里勅賜額元至元二年重  
修有進士劉汝周碑

鳳仙道院在永寧州西里三陽雲鳳山卽希夷殿

羽客孫雲際亦棲居於虛樓白雲洞明洪武甲子

天真觀道人王混然道者張仲謙建許孟和撰記

正統六年修河東王撰記

金閣寺在永寧州西北三十里馬頭山之下舊志云  
梁武帝重修世俗傳先有金閣寺後有石州城之語  
靈泉寺在永寧州西南百二十里孟門之南頂舊名  
南山寺唐貞觀中勅建有泉飛瀑山椒旱禱輒應金  
大定中勅賜靈泉寺額元圓光禪師號勝默子住此  
戒行卓越明仁宗賜釋志亨號圓契大師併賜佛乘  
安國寺在永寧州西二十里相傳唐昌化公主食邑  
時代宗以佛牙二賜公主爲建寺置銅塔貯之今失  
其一然代宗十八女無昌化公主宜屬舛誤山嶺有  
安國王城基金興定三年重建寺東有琉璃井井側

有牡丹二株高丈餘山半石巖下有靜室于清端讀書於此有讀書樓大學士吳琬題釋性善字純天俗姓李隰州人能詩清端讀書時夢餐鉢羅花性善檢藏曰此優曇花也清端作詩記之

香嚴寺在永寧州西六十里唐貞元中勅賜額金正隆大定間重修有碑

柳溪寺在永寧州南七十里宋嘉祐三年建

華嚴寺在永寧州西三十里金大定四年重修勅賜華嚴寺額

龍泉寺在永寧州西六十里金大定中勅賜龍泉寺額

院額元至元中重建名鳳背禪寺。

天寧萬壽寺在永寧州治東北元大德四年建內有石刻羅漢像十有六稱爲四絕謂作畫寫刻也。

金容寺在永寧州西南三十里元至正中建。

洪濟寺在永寧州西八十里山頂古塔有翰林馬汝驥記。

迎曦寺在永寧州北百二十里銅柱山山高數千仞半山湧泉寺踞其巔。

寶泉寺在永寧州北六十里山頂有泉因以名寺。

江猪寺在永寧州西七十里寺後石洞懸一石似猪。

下有潭。明成化中斷其喙。潭遂涸。

石佛寺在永寧州西二里虎山旁。一名龍興寺。內石像三。相傳山水暴漲浮來者。

元都清虛觀在寧鄉縣東一里卧龍岡。洞真子高志輔隱此。穿穴以居。王伯昌陳資壽爲建觀。蛻後門人立石。元丁未。秦志安撰記。

天真觀在寧鄉縣西百一十五里大成村。元延祐五年建。

修真觀在寧鄉縣南四十里没虎臺之山。明韓教遠修真於此。養一鹿名仙童。後與其徒皆死於盜鹿。

石亦死數日有自平陽來者言見沒虎觀二道士引鹿南去。

龍泉觀在寧鄉縣東南十里柏窰山。

寧國寺在寧鄉縣南五十里白石村唐顯慶二年修金大定四年重修有金時碑。

廣濟寺在寧鄉縣西北九十里柏林山相傳唐時建金明昌三年修僧海淳元初賜號宏法領山西路僧尼等事坐化時有五色祥光見空中頃之獲舍利三百餘粒有碑僧智瑋有辭世頌刻於石僧惠閣有異行時呼爲忠融菩薩元丙申端坐而逝亦有碑明正

十三年別構毘盧殿及七佛殿嘉靖三十一年僧  
善琴修舉人龐賢撰記 國朝康熙三十二年重修  
鐘樓禪院亦在柏林山有石碣記仙姑遺蹟仙姑鋤  
溝鎮逯氏女出家五臺山後歸柏林有鉅鐘衆莫能  
懸各就午食仙姑舉而懸之及衆覺已坐化矣土人  
感其異建祠祀之明萬歷四十七年重修禪院舉人  
賈同春撰記

清涼寺在寧鄉縣治南舊名南山寺在縣東松林坡  
金明昌中建後廢移建今所

普照寺在寧鄉縣西五十里上鋤溝村元泰定四年

建

石佛寺在寧鄉縣西克虎村元至正三年建  
鷹嶺寺在寧鄉縣南二里明景泰三年建